

四庫全書

集部

欽定四庫全書

石倉歷代詩選卷二百五十

明 曹學佺 編

元詩二十

周權

擬古

東溟躍羲和西海沉望舒迭運不遑息汲汲司晨哺人生百年間有如涉長途途長日苦短何以寧其軀白露

沾我衣衆芳忽萎枯
逝將躡飛霞駐景凌方壺

又

山中有孤松托根在深澗
磊磊多節目偃蹇歲云晏
豈無干雲心亦有傲雪幹
蕭颼起清奏可挹不可玩
大雅久寂寥古瑟弦已斷
美哉遺音存佇立為三嘆

讀淵明傳

淵明任疎散出處皆逍遙
悠然解縣組不折五斗腰
晴川風日佳歸舟喜搖搖
及門對妻子不覺衣囊枵
居貧

道則腴念澹迹已超時復會田家興至不待邀種豆在
南山種苗在東臯投閒偶成趣心逸身匪勞孤懷托素
琴萬事付濁醪樂天以乘化內適何陶陶若人渺何許
世遠不可招千載東籬花寒香翳叢蒿采不盈掬佇
立秋風高

紫鳳吟

楚客青綺裘售我紫鳳圖且言覩祥瑞與子懸座隅裴
回感客意因以致我辭不能鳴朝陽高翔碧梧枝惜哉

五章備乃向縑素施我圖已在揭顛倒隨天吳殷勤謝
客去玩目非所娛

古樂府

妾有嫁時鏡皎皎無纖滓照妾芳華年塗澤如花美郎
行向天涯歲月忽踰紀空閨生遠愁妾容為誰理妾容
匪金石寧復昔時比重拂故匣看烟烟光不已人情重
顏色反目如覆水願郎待妾心明與鏡相似

原上楓

青青原上楓春至暢柔葉雨餘似膏沐幽蔽深澗合昨
日原上行寒林淨如削此時澗中松偃蹇睨冰雪

牧童詞

我牧不憚遠牧多良苦辛所幸牧已狎馴擾無敗羣平
原濕春煙碧草何披紛大牛隱重坡小牛飲芳津旦出
露未晞及歸景常曛時復扣角歌歌俚全吾真取樂田
野間世事非所聞

桃柳詞

灼灼絳桃花裊裊黃柳絲風流少年場妖冶不自持春
風日夜變點拂飛故枝飄紅惹飛絮流水同天涯美人
麗南國蘭蕙熏柔姿青春妬娉婷笑盼生光輝素絲感
清鏡朱粉難為施奈何桃柳質歲晏徒傷悲

東林行

意行追遠趣所詣欲登仙絕峽下蒼黑半壁懸銀泉峰
回路不定曳杖聊夤緣延流忽舒曠櫛楠影翩聯怙目
霽孤墅洗心玩芳荃永晝無樵斤芳洲愜鷗眠幽迥人

境異似與隱者便巖花映石瀨漁舟起孤煙

懷別

青桑蔽繁陰玄鳥春將暮東風老松花長林翳黃霧
俛首事鉛簡流光暗中度淮水日夜流美人邈難晤
賓鴻盡北歸誰與達書素長歌復徘徊晴川渺煙樹

暮春

衆芳麗春輝天冶眩紅紫紛紛兒女情園香醉羅綺
笙簫夜鳴鳴中旦歡未已鵲鳩何處鳴繁華總流水
誰知

搖落時可以觀物理

遊山寺

空林淨如掃石徑穿嶺細紺廬出深樹飛湍下雲際偶
逢赤髯侶囑我聽真諦菰肥齋鉢豐棧古佛燈翳遶簷
棘籬短野枳香入袂夕磬兩三聲半巖花雨霽

濯足

投迹處田野野僧日相親畫棋松下石夜榻山中雲流
水何處鳴澗芳漱餘春濯足坐芳澗浩歌復誰聞

溪之濱

小雨淨川綠玩心鷗鳥羣拂蘚憇幽磴松花點衣巾禪
局杳何處踈磬時遠聞青煙濕山道牛羊下斜曛

仙源

桃花悄無踪仙源渺何許流水清於銅松色與崖古長
林暮蕭颼似與幽人語脩然臥空菴清猿夜深雨

幽居

索居簡人事與世意空投柴荆已就理歲功念西疇落

落雞犬墟隱隱漁樵州嘯傲一壺綠聊復寫我憂及辰
遇冲賞獨策還經丘向夕山景霽延矚明川流白雲息
空谷歸鳥鳴林幽人生亦委化汲汲將焉求

秋原

晴烟澹秋原枯梢翳殘葉蘭芷徒自妍芳馨誰採掇豈
無同心人歲月念飄忽詠思河水深迢迢暮雲合

謝僧茗餅

僧達無生機寂念若冰冷汲來石根泉淪以雲腴餅舌

端味枯禪了然發深省歸詠石林空清颺下松頂

次韻張洞雲

張子湖海襟乃復喜嵩穴朝飧進芝髓夜誦然松節深
雲暗幽洞仲夏欲飛雪下春炫餘景林水互明滅款客
垂磬室頗感十年別攜琴意已消酌茗石蘿月

楮澗月

道人澹無為懶散忘盥櫛掃石秋樹根曙澗濯殘月袖
浥水光潤屐帶山翠滑虛闌倚雲歌清猿共孤絕

湘中

天寒楚雲淨木落湘山幽空江夜來雨水滿蘆花洲西
風何渺渺滄波日悠悠有懷誰與言注目孤鴻秋

西山

西山一何佳稅駕謝囂塵獨往殊有趣野鹿時親人冷
泠澗下水練練山際雲幽憇任疎散岸幘青楓林

夏日偕友晚步飲聽泉軒

終日局環堵散策窮深幽嘉我二三子落落誠罕儔適

意隨所詣行行遂經丘青松如高人含風自蕭颺夕雲
度深翠爽氣衣上浮石根瀉幽泉戛戛鏘琳球樂彼泉
上趣幽構飛岑樓新蘭秀而滋舊竹清且脩款我情頗
厚清尊頻獻酬盤桓有餘樂嘯傲成遲留池深風露香
荷意澹欲秋飲散衆喧息微月生林樾

山中雲

空山有白雲雅與高人約卷舒本何心乃似悅遐矚色
幽淡山翠意遠度溪綠日暮久徘徊前村雨應落

次韻幽居

晨興啟衡門見此溪南山山光入溪綠水底明青鬢熙熙自漁樵清歌時往還莞爾發永悟寔我丹青間

清溪深

連娟數里洲翠篠何森森微風動枯籜謖謖鳴空林雨散幽猿啼野樹煙沉沉薄暮誰搖棹欸乃清溪深

相逢吟

客從郢中來抗志青雲表持螯共拍浮江遠孤舟小寒

夜潮氣白楚樹晴烏早酒闌起推篷落月在西島

明妃曲

逝水無回波去箭無反筈十載昭陽春萬里龍荒月風
沙滿宮衣慘淡餘香歇哀絃濕絲淚淚盡絲亦絕寄語
漢飛將此計誠太拙蛾眉豈長好不久為枯骨

贈雷紫崖高士曾築室于華山

紫崖高人頭欲雪神清貌古髯過膝禿蛟入硯生雲煙
叱咤風雷鬼神泣清宵幽夢回瑤壇鼎中龍虎催九還

飄然晞髮太華頂醉睨海浪天風寒竭來訪我蒼溪澗
白石清泉不堪煮共譚世事兩茫然竹屋青燈夜深雨

牧羝行

朔風吹沙浩漫漫冷光射目愁雲昏茫茫大漠亘萬里
何處有路通中原羣羝牧老草枯死倚節自誓無生還
餐羶嚙雪氣自倍婉孌兒女懷飢寒夜長空望漢月白
幾度吊影怜羈單已將傲兀壓憂患獨仗大義排堅頑
此生自信羝不乳豈意雁足傳間關歸來屬國豈不厚

區區一飯皆君恩

紀信嘆

沛中龍奮砮礮雲咸陽楚炬三月焚兩雄角起鹿在野
三戶有楚無強秦貔貅百萬紛如雪戈矛盡染英雄血
旗旄曉蔽大河雲兵塵夜暗中原月滎陽數載戰不休
重圍食盡漢亦憂將軍詐帝出降楚脫帝虎口真良籌
無何諸將已平楚事定論功裂茅土獨無旌美到將軍
不得褒名紀盟府男兒死節志已酬瞑目地下夫何求

金
卷一百五十
吁嗟功怨俱悠悠漢庭雍齒還封侯

子陵釣圖

東都熱官手可炙吳儂面似秋江色平生落拓一羊裘
七葉貂蟬不堪易功臣盡在雲臺中丹青化作灰塵空
先生遺貌乃在此釣竿尚裊桐江風悠悠世事江雲白
過眼輕帆自朝夕人間萬古仰孤風天上有星猶是客
清溪張掃雲不嗜酒肉工詩安貧所作少年行

因次其韻

五陵年少風流客花間開宴春壺碧
豹胎熊掌羅玳筵犀筋逡巡萬錢值
綺羅吹香圍肉屏棖棖銀甲喧瑤箏
高燒紅蠟作長夜白日過眼如流星
可憐氣岼如山阜雨散雲飄不能久
繁華富貴總成夢昨日朱顏今白首
爭如芝田野老衣懸鶉飲撰芝朮餐
芳辛新詩日富不厭貧謂有堯舜為
吾君少無佚樂老無戚尺澤自可潛
幽鱗誰知清溪有鶴不可馴白雲浩
蕩青林春

焦山寺

赤霞夜出扶桑東海雲捲浪淩虛空剛風浩浩吹不去
崔嵬化作青蓮宮萬朶月寒清梵寂四面沉沉皆海色
鐘聲不許到人間自送潮音落寒碧

採蓮曲

越溪女郎十五六翠綰香雲雙鳳感嫣然一笑似花妍
艷試新妝照湖綠羅衣露浥紅芳秋少年陌上情綢繆
蘭橈容與隔花語驚散鴛鴦生晚愁蓮花莫折莖有刺
藕絲易斷針難度清歌一曲入湖煙空載香風滿船去

甓社圖

碧天如幕沉雲影飛簾不怒銀濤靜驪龍正睡貝宮寒
一鏡光凝青黛冷數聲玉笛來何處白鳥雙雙忽飛度
夜深明月生孤篷人在廣寒臥風露

八里庄渡淮入黃河水渾不可飲過徐入清河
水方澄潔信筆閒記

河流汨汨如涇水濁浪崩騰疾馳駛一石中膠數斗泥
舟客居民皆飲此黃河不復行故道下注清淮通海涘

十人度索上一洪寸寸強弓挽難起屹然跌坐如僧禪
日與篙師同愠喜青山一髮認邳州蕭條暮上魚豚市
酒邊一笑我何為獨冒驚濤行萬里爭如林下混漁樵
俛仰嘯歌行復止回頭寄語北山雲征塵待向風泉洗

雞鳴臺

橫空陣氣長雲黑戈鋌照耀旌旗色龍跳虎躍鬼神愁
漢楚存亡一絲隔相持兩地皆雄據楚力疑非漢能拒
瑞啟炎圖砥礪雲悲歌霸業烏江路空餘故壘傳遺迹

離合山河幾勦敵戰塵吹盡水東流落日沙場春草碧

謫仙樓

大羅仙子李太白秋水踈蓮浮玉色一來金馬玉堂中
詩酒猖狂天子客飄飄豪氣秋風起登樓曾醉山東市
放浪形骸宮錦袍榮華富貴東流水酒酣揮洒翻河筆
險語能令鬼神泣至今光焰照塵寰一字堪償雙白壁
我來懷古空悽愴風月千年尚無恙何時相見崑崙丘
汗漫從遊九天上

濟南原上

朔河春透冰未裂黃蘆伐盡洲渚濶荒祠老棟壓欲頽
古樹無枝枯復活長嘶飛騎抹流雲草舍微茫聚疎樾
夕陽返景低黃埃漠漠平沙浩如雪

冠州

臨津衝要環墟市橫橋斷岼人如蟻車聲軋軋風蓬蓬
道上黃塵半空起御河柳色如藍綠翻翻酒旆風高矗
歸馬聲喧烟火深落日孤城催暮角

呈趙子昂學士

蓬萊仙人似松雪曾向天潢溯銀闕天孫為製紫衣裘
五色雲邊佩明月近聞承詔白玉堂詞頭夜下風雨忙
一揮九制夜未艾金蓮分賜宮壺香淋漓妙墨蛟螭走
世有鍾王皆斂手偶然醉帖落人間隻字珍藏抵瓊玖
我家浙水蒼山東閉門偃臥甘詩窮瓣香未展師道敬
攜琴蹙出杉蘿中問公何日作霖雨只把文章事明主
願恢斯道澤斯民奕奕光華照千古

趙子華乃跣跣之士齒新氣銳痛飲豪吟座中
未有出其右者

趙君胸吐虹五色飲酒哦詩世無敵夜寒濯髮富銀潢
酒星飛入錦綉腸眼花耳熱忘爾汝筆陣如雲來黷武
幾番玉板連秋霜空中錯落天葩香千奇百怪驅風雨
露洩玄機鬼神語須臾收歛寂無譁依然醉盃翻流霞
蒲萄酒

翠虬天矯飛不去領下明珠脫寒露累累千斛晝夜春

列甕滿浸秋泉紅數宵醞月清光轉穠腴芳髓蒸霞暖
酒成快瀉宮壺香春風吹凍坡瑤光甘逾瑞露濃欺乳
麴生風味難通譜縱教典却鸛鷖裘不將一斗博涼州
古琴漆有蛇蚺紋者材之良也道友攜一琴甚
古謂是零陵湘石枯桐斲成索價三百緡無
償之者戲作湘桐吟

黃鍾沉聲喧瓦缶良材入爨知多少誰裁鳴鳳千年枝
蛇蚺龍紋巧蟠紐澤堅古漆光不磨徽絃不具含雲和

已無伯牙之手子期耳三嘆如此湘桐何

長城

長城戕戕起洮水盤踞蜿蜒九千里朔雲浩浩天茫茫
悲笳落日腥風起猶傳鬼神風雨夕知是當時苦苛役
征人白骨掩寒沙化作年年春草碧祖龍為謀真過計
自成限域非天意力窮城杵怨聲沉禍起蕭牆險難恃
豈知一朝貔虎來關東咸陽宮殿三月紅

次韻馮仲遠聽隣舟孟監州琵琶

江州司馬真愁絕潯陽夜醉黃蘆月琵琶撥動兒女情
淚濕青衫寫淒切漢東傑客老監州雲夢胸中吐奇崛
春風斗酒忽邂逅暮雨扁舟談激烈酒酣古調手自傳
鷗絃撼動龍香撥抑揚按節氣雄放清度回颺激林樾
迢迢訴盡出關情漢宮往事孤鴻滅黃雲萬里絕音塵
馬上誰能記嗚咽新聲洗盡鬱輪袍清和扣舷歌間發
曲終一笑兩茫然江水泠泠滿襟雪

次韻湖亭秋望

紅衣老畫玻璃國孤嶼人煙落秋色豆花過雨水風涼
落日殘蟬踈樹碧雁天紺滑秋雲淨玉涵烟烟開寒鏡
蟾枝香冷酒微醒長笛一聲無盡興

冷泉亭

昔人來自天竺國縹緲孤雲伴飛錫天風吹落凝不去
化作奇峰聳空碧至今裂峽餘雲髓桂冷松香流未已
翠光圍住玉壺秋不放晴雷度山趾道人宴坐無生滅
烟烟層胸照冰雪夜深出定汲清冷寒猿啼斷西巖月

次春日即事韻

吳蠶欲老疇未秧拍堤野水迴橫塘淡煙疎樹綠陰薄
落花飛絮白日長寒具油乾過冷節匆匆芳事歸鶗鴂
枕書睡足午窗明雪乳浮浮翻兔褐

溪村即事

寒翠霏崖壁塵囂此地分鶴行松逕雨僧倚石闌雲竹
色溪陰見梅香岼曲聞山翁邀客飲閒話總成文

曙巖上人

巖扉人不到竹色滿僧闌林雨添經潤窗雲入硯寒夜
龕猫占臥晨鉢鶴分餐客至無餘事敲冰煮月團

答張渭濱

與子三年別相思日幾迴攜琴松下石沽酒隴頭梅驛
遠書難寄山深雁不來渭濱千畝竹瞻汴重徘徊

過上居

數里榕陰合迢迢客到稀溪煙桑子熟山雨藥苗肥窗
冷雲侵座琴清月在扉怡然無俗事吾已早忘機

野趣

地偏居自穩石路接平田雲合茅簷樹雨添花澗泉空
山晴滴翠遠水綠生煙喚酒青林渡斜陽繫客船

贈別

南雁飛應盡攜書始問程別離情易惡貧賤意難明樹
色春城暗鐘聲曉寺清孤燈山驛酒後夜共誰傾

仙遊

萬事雙蓬鬢江山賦倦遊斷猿明月曙疎雨碧梧秋道

路中年感琵琶後夜愁客懷無處寫離思滿滄洲

宵征

野路無郵傳迢迢第幾程
天河山外落江月水中明
客久衣偏冷車單馬易驚
前津分曙色依約有農耕

郭外

郭外人家少漁村颺酒旗
江雲低壓樹沙竹細穿籬
地暖梅花早天寒潮信遲
夕陽煙景外倚杖立移時

社日

端居忘節序物化靜中觀
遠岫春雲澹深村社雨寒
溪花紅映屋堦樹綠平闌
喧醉田間叟雞豚日暮歡

來雲僧舍

聯雲開佛屋接竹引巖泉
路滑迷霜葉鐘寒閣曙煙
有為皆是幻無想總成禪
夢覺僧簷雨重來又十年

客中送張歸云

相逢俱是客對酒感流年
落日沙頭雁清風樹杪蟬
山鐘隔林寺江火趁潮船
何日茆簷下清燈話雪川

次韻村居秋日

瓜芋芄芄綠滿疇村居客意樂深幽
白雲僧屋開孤嶂踈竹人家帶淺流
半榻清燈初耿夜一聲長笛欲橫秋
何時歸把滄洲釣已軟閒盟向白鷗

春初宿湖山僧舍次雲崖道士韻

竹窗紙閣淨無塵僧芋閒邊偶共分
爐火夜紅松節耐渚波春綠荻芽新
林深瀑潤全疑雨日落山寒半是雲
相對不知身是客了然房琯悞前因

村行

風落漁歌隔浦聞
前村獨樹正斜曛
誰家桃李迷荒棘
半隴牛羊臥古墳
橋斷春堤多積雨
溪深野碓自春雲
青旗摇曳疎林處
剝把閒題與客分

張氏新君

小雨東風拂袂寒
神仙華屋畫圖間
茶香入座午煙歇
花影壓簾春晝閒
翠竹白沙泉細細
朱闌綠樹鳥關關
客來一笑推棋局
坐占溪南十里山

秋日

石脉泉花蘸眼明
竹根沙路舊經行
雲歸天際山容澹
日落江頭雁影橫
梧葉庭除秋漸老
豆花籬落晚初晴
客行迢遞歸心遠
煙火蒼茫起暮程

次韻閒居

鐘鼎山林有命存
游心物外已忘言
希夷太華烟霞室
處士孤山水月村
齷齪可憐雞舞甕
昂昂未羨鶴乘軒
不須對客談餘事
笑領琴歌竹下樽

次韻秋望

暮鴉歸處斷霞明搔首風前萬里情
煙抹山光翠屏冷
水涵天影玉壺清蟲鳴沙逕宵初永
雁落蘆汀月未生
何事數聲江上笛吹將離恨滿孤城

訪陳子高德星堂

短策輕衫借晚涼偶來談笑德星堂
竹深四壁生虛籟
山近半村無夕陽池折泉聲歸座爽
松蒸雲氣濕衣香
蕭然門巷無輪鞅隱几觀書味更長

次韻孟韶卿

知道龐公不出山，因為訪鶴借山看。
海棠開盡雨方歇，燕子來遲春尚寒。
一塢烟霞隨步屨，千峰紫翠入憑欄。
掉頭巢父成何事，謾向珊瑚拂釣竿。

送友東歸

東華厭逐軟紅塵，一見潘郎興味真。
落落孤松霄壑志，昂昂野鶴水雲身。
關山客夢三更月，驛路梅花十里春。
誰唱渭城朝雨曲，座中愁絕未歸人。

次韻山齋

娟娟萬竹照清溪約住閒雲作伴栖
隣曲樵人曾結社樽前詩客偶分題
東風一樹棠梨老落日千山謝豹啼
閒向靜中參物化人間岐路任東西

毗陵

數家煙火自成隣寂寞荒祠野水濱
壞屋有基餘瓦礫古墳無主自荆榛
暄風綠樹鶯聲老曉雨青郊虎迹新
四月三山山下路野田猶殿菜花春

懷歸

攜琴訪戴泊京華
饋鯉無人雁不過
客路重陽歸未得
吾廬三徑近如何
白雲日望關心久
明月天涯歸夢多
寄與此山堂下鶴
一竿分合老漁蓑

次韻令尹解官歸九江

滿眼山河落木秋
遠遊時復賦聲樓
解官彭澤如元亮
呼酒新豐似馬周
歲月駸尋人易老
乾坤浩蕩水空流
輸公已了公家事
臥對廬山雪滿頭

懶菴講主得九江餅茶鄧同知分餉其半汲泉
試之因次韻

解組歸來萬事輕日長門巷澹無營團香小餅分僧供
折足寒鐺對客烹色捲空雲春雪湧影沉江月夜潮生
一甌洗却紅塵夢坐愛風前晚笛橫

題松

桑樹雞鳴坎吠蝸炊烟隔水幾人家青松將謂專欺雪
春到山中亦有花

晚眺

閃閃歸鴉過別林
斜陽流水意沉沉
數聲樵笛人何處
一路寒山晚翠深

漁翁

鶴髮崢嶸兩鬢絲
白鷗相近久忘機
綠簑帶雨不垂釣
閒掃秋雲坐石磯

轉棹收帆日未西
短篷斜閣斷沙低
賣魚買酒歸來晚
風貼蘆花雪滿溪

雪霽

寒侵竹屋瓦燈青獨據枯梧興似僧落月推窗看殘雪
梅花半樹一溪冰

信題

已識浮雲似世情歲寒老硯是心朋平生不貸監河粟
自擷香芹煮澗冰

晚渡

離離野樹綠生烟灼灼山花爛欲燃沽酒人歸春渡寂

柳根閒繫夕陽船

曉行

依稀林影弄晨光
滿袖東風野興長
沙岼雪消春碇暖
一灣流水落梅香

除夕長河客舟

爆竹聲中歲又闌
畫船千炬照波寒
清樽今夕同誰飲
自買梅花對燭看

雨後

鳴鳩村暗曉寒天
白水交流亂野田
落盡殘紅春不管
一川風雨閣榆煙

邳州

百戰殘城古下邳
白門樓下草萋萋
古來多少英雄恨
落月城頭烏夜啼

客枕

落葉蕭蕭擁石闌
轆轤聲斷井花乾
夜深天濶風霜緊
落落江風月正寒

歐陽學士過訪

玉堂仙忽枉華鑣客舍如何採澗毛袖有建溪春一掬
萊山石鼎煮銀濤



石倉歷代詩選卷二百五十

欽定四庫全書

集部

石倉歷代詩選卷二百五十一

詳校官庶吉士臣范逢恩

侍讀臣孫球覆勘

總校官進士臣朱鈐

校對官庶吉士臣潘庭筠

謄錄監生臣周士標

欽定四庫全書

石倉歷代詩選卷二百五十一

明 曹學佺 編

元詩二十一

傳與礪

歌風臺

黔首厭秦暴龍德奮炎劉英雄乘天誅拔劍起相仇天
風墮陵谷飛雲揚九州天下事既定懷土未遑休置酒

冥高臺中厨進庶羞悲歌落林木父老皆涕流功臣日
殖醢壯士復何求至今豐沛間長顧使人愁故鄉帝所
愛零落遺舊丘大運各有終賢聖誰能留焉知萬歲後
魂魄復來遊

題宜春鍾清卿清露軒

秋氣集太虛夕光溥高樹時聞陰液墮暗識商飈度旒
旒星動林英英月霏霧涼局息塵想幽琴寄玄悟寂歷
松上聲逍遙丘中趣釣天澹斜景銀河暖微素古調今

所稀大音誰能喻仙人飲沆瀣壽命金石固千歲不可期空歌徒延慕

寒竹篇

寒竹依澗阿石生何磊磊滋息因厚地生成藉玄宰春陽散華景枝葉被光彩及茲芳歲闌使我憂心痙遽悲凜節變但恐驚塵浼寒燠既異宜遲暮復焉悔淇園蔭未息嶰谷音猶在君子夙相好深懷邈雲海竹性諒靡遷人心懼中改願言卒封植勿使傷樵采

勤耕亭

日月靡閒暇四序更運之斯人務作業矧敢怠遑時負
耒適西疇恒患耕作遲仲春時雨至羣物具含安牛食
青澗阿鳥鳴芳樹枝興言播嘉穀夙夜將耘耔豈不懷
逸居亦念寒與飢但使秋稅畢聊樂及我私

少年行

長衢若平川輕車馳流波上有都人子明肌豔朝霞芳
塵揚遠風白日耀舞羅少年輕薄兒調笑相經過狎坐

酌美酒日暮酣且歌千金罄一笑豪右焉能加時俗誇
朱顏美女悅春華春華豈不好遲暮當如何

雜詩五首

天天園中桃鬱鬱松上枝春陽發新榮貞脆誰能知一
朝繁霜墮百卉各已萎青青乃自保不為時所移向非
厄歲寒何以別竒姿

植蘭彌九畹種菊被三徑幽芳乃殊姿馨德良可並
蘭以為美餐菊以資命賸言理蕪穢恒使枝葉淨蕪穢

苦易侵枝葉苦不盛豈無桃與李貴此諧野性

窮巷有畸人夙夜勤古道敝衣適至骭疏食恒不飽歌
聲若金石顏色終歲好豈無當世念所趨惡佻巧美玉
不足珍懷義以為寶

閒夜坐中庭素月流我懷鳴琴發玄思俗音難與諧微
颺經前楹徐響正裴回欲歌南風曲聽者良已希願言
薦清廟復感鳳來儀

異人言種石可以致雙璧千金受玄秘辛苦乃有獲溫

其比君子韞積良愛惜青蠅易為汙恒恐傷厥德連城
不願售思以置君側終歲無與言持之將安適

雜詩

皎皎素明月娟娟含令姿浮雲遽起滅圓影遂參差山
川莽回互天地亦相疑焉知冥昧中明潔終不移弦望
有恒運清光寧久虧

題淵明漉酒圖

淵明性嗜飲所遇適其真漉酒東籬下邈若旁無人捐

綏非所吝焉愛頭上巾田園日成趣松菊相與親百年
何為爾醕酤及茲辰陶然至和內混沌以為隣

八月十三日至京

孟秋涼颼至驅車出西門去京始彌月白露忽已繁茲
行亦何為于役義所敦山川既悠遠晨夕違清溫我馬
北以南豈不賁丘園努力在王事賢勞奚足論

羣雁圖

微茫洞庭野隱約瀟湘岬鴻雁將栖息飛鳴求其伴先

集良未安後至淒欲斷使我懷弟兄因之中腸亂留連
江海遠慘淡秋暉晏常恐隨天風高飛入雲漢

題袁宏泊渚圖

秋氣集空渚月彩汎微波夕坐起遙思中流聞嘯歌移
舟近相即酌酒望銀河高懷世稀偶良會豈更多未知
百歲下視此復如何

江州社日阻風

社日長為客行人總念羣湓江春過雨廬阜晚生雲綠

酒洽歡飲清絃送別聞風檣未得動堅坐且論文

下邳懷留侯

豪傑關休運乾坤屬遠猷自須成漢業豈獨報韓仇黃
石嗟長往青山感昔遊同時多草莽事定覓王侯

七夕

耿耿玉京夜迢迢銀漢流影斜烏鵲樹光隱鳳凰樓雲
錦虛張月星房冷閉秋遙憐天帝子辛苦曾牽牛

海子上

獨步金河上遙看碧海隅洞疑通月窟船或到方壺蛟
室寒休杵龍宮夜出珠浮槎八月晚應念客星孤

賦得天際舟送兵部張孟功治河

日下行人發春晨去鷁催纜侵斜月解帆向斷雲開愛
鳥窺詩卷垂虹映酒杯尋源不可盡奉使幾時回

詠大樹答靳御史

造化涵滋息神靈會渺茫色分羣木秀陰覆數家涼白
晝鳴風雨玄冬度雪霜因知免樵采故解拂雲長

送金華王琴士還山

年少金華客，囊琴暫出山。
忽聞春水滿，徑逐暮雲還。
三洞飄玄鶴，雙溪下白鵬。
應尋牧羊子，時過綠蘿關。

寄題余泰亨隱居

聞說幽栖處，遙連郁水天。
徑開移竹地，渠引灌花泉。
坐客留傾釀，隣人訪草玄。
京華遠遊子，那得共盤旋。

答別龍州蕭從事韶

北極綵綸下，南陲政化通。
靈槎浮度斗，瘴草偃隨風。
殊

俗難為別清談喜屢同馳驅不可住心切大明宮
使節明金虎腰弓偃畫蛇蠻荒趨號令原隰見光華邊
樹猶含綠江梅久放花憶君依幕府何日定還家

梧州嘉魚亭

舟楫回沙驛旌旗駐郡亭江通五管白天落九疑青此
日瞻雲氣誰家見客星軍需晝夜急寇盜幾時寧

別靜江文學諸公

乍見先愁去將行未忍分字期歸後寄歌畏別時聞驛

樹過春雨江船隔夜雲驅馳念吾弟羽翼待諸君

金陵晚眺

金陵古形勝晚望思迢遙白日餘孤塔青山見六朝燕
迷花底巷鴉散柳陰橋城下秦淮水年年自落潮

沛縣

縣路迷青草行人蔭綠楊時逢沛父老能說漢君王芒
碭來秋氣彭城送夕陽凭高發慷慨暮色正蒼蒼

京師守歲

日月催時序乾坤隔晦明殘年萬里夢今夕幾人情久
客煩朋友雙親倚弟兄深慚須薄祿不得謝浮名

又上人求母汚陽

開士辭家早慈親割愛深倚門思一見飛錫到相尋雁
度雲移寺烏啼月照林此時憂白髮長路政關心

桃源圖

聞說避秦地花開忘歲年偶逢漁父問長使世人傳丘
壑渾疑幻林廬或近仙至今圖畫裏惆悵武陵船

題墨梅

老樹亞晴空疎花帶寒野風流不自惜澹泊從人寫歲
晏孰相娛空山少來者

孤花何婉婉玉立含幽素短短時出橋疎疎或臨路全
疑簷下月半照牆西樹

題衛知事廣衍倉西軒墨竹歌

吾聞渭川竹如簣太倉欲致那可得開眼睛煙落戶牖
透裳冰雪生胸臆愛之借問作者誰母乃與竹同標格

自是君懷足清致故須好事留真迹陰森雨氣發中林
颯爽秋聲起前席傲坡直具百畝意老幹真憑萬鈞力
玄豹猶含隱霧章蒼龍已奮干霄翼火雲六月思遠避
安得坐我林間石待實誰憐彩鳳飢釣鰲未試長竿直
為君歌罷久歎息羣玉蕭蕭動高壁

奉題陳參議溪山四雅圖

陳公退食一事無閒閤示我溪山圖晴林當晝發煙霧
頃刻松陰生座隅恍聞鳴琴動疎竹一亭宛在清溪曲

樹下風聲出舸船石間水影搖棋局隔溪高堂鬱森爽
丈人避世嗟長往嗜書無論終日讀讀畫時更臨風賞
可憐九老幽致同欲往從之不可通我貧何時見此屋
悵望林壑生清風

邯鄲行

邯鄲城頭下白日邯鄲市上風蕭瑟故壘空餘鳥雀悲
荒垣只見狐狸出何主墳墓對山阿尚憶諸侯爭戰多
趙客歸來重毛遂秦軍老去畏廉頗黃塵白草宮前道

鬼火如燈夜相照公子秋來不見歌美人月下那聞笑
當時冠蓋激浮雲過鐘考鼓宴青春只今惟有郵亭樹
還送年年行路人

八十里山行

桂林之區徭賊雜處南有八十里之高山絕天綿延開
險阻賊人倚之作巢砦劫掠經年勢還大官軍收捕費
供給主將遂巡竟何待居民近山晝夜愁四下行人皆
白頭况聞良家半為賊官府貪橫仍誅求安得大聚邊

頭兵甲鑄田器盡鋤高山作平地高山平徭賦斂

銅爵硯歌

鄴中文磚天下奇流傳為硯亦堪悲月砌寒傾古臺暮
雨犁耕出斷釵時荒涼火燒狐兔窟金棺別葬奸雄骨
石麟暗刻魏春秋銅爵空題漢年月可憐此硯依浮世
曾見高筵美人醉行迹猶霑舊鞵塵啼痕已滅新粧淚
向來登踐日紛紛即今磨洗見奇文題詩為弔西陵樹
幾片殘霞入雁羣

牧牛去題哀慶遠經歷所藏畫

牧牛去千山復萬山上山日出愁起晚下山日入苦行
難手中鵠鵠牛伴侶養來多日能人語縱牛不牽繩自
垂聽他行食母苦之欲歸尚憂牛不飽更近前溪多水
草但願年年牛盡肥主翁足食身足衣農家養牛國所
賴惡少城中殺牛賣

賦得秋夜長送方叔高

秋夜長長如歲

附

夜涼薄人不能寐羣雁各南翔一

鳬尚北飛團團素明月流光照我衣當歌正激烈慷慨
送將歸丈夫成名微亦足焉能終夜悲刺促

秋月皎皎夜何長念君客遊思故鄉當壚美人惜年芳
遙夜起舞歌清商歌清商送急管為君酌美酒請君勿
辭滿夜長迢迢漏未終離思比之何時斷離思長夜猶
短

送楊元成奉旨之徽州過家錢塘

綠槐五月高雲冷行人辭闕歸鄉井奎壁秋迴帝座深

斗牛夜隔天河永君今銜命出江關却到新安幾日還
天上應須朝絳節湖邊何得愛青山

用王著作見寄韻奉題其所寓聽竹軒

王家好種青琅玕四壁秋聲生夏寒朝回每獨風前立
客至時同煙際看北窗數竿最幽勝滿耳蕭蕭客塵淨
截管休將學鳳鳴世間古曲無人聽

韓淮陰廟

淮陰千古英雄恨楚樹荒荒夕照殘水夾廢城春草合

雲昏迷廟野花寒封齊安用真王印興漢空遺大將壇
高帝旌旗俱寂寞斷碑零落後人看

送唐子華赴嘉興

聞君秋思滿南湖行李今晨發帝都
幙府初乘從事馬江城還憶步兵鱸
樹浮白日山侵越潮蹴青天海入吳
閒暇憑高動詩興須成一醉掃新圖

和危山曜寄弟

故園兄弟總相思久客懷歸屢失期
司馬却慚題柱早

東方翻恨上書遲
都門柳暗愁中見
鄉國花繁別後知
昨日南橋放春水
望雲回首獨多時

題畫船入蜀圖送夔州教黃尚質

楚客之官泛蜀船
畫圖盈尺見山川
九江樹色瀟湘外
三峽猿聲灩澦前
方譯漸通巴俗語
國書新絕漢人傳
豈無好事能携酒
問字時時集講筵

王氏相師山庄

相師之山雲杳冥
千巖萬壑倚空青
上方雷雨藏天井

南極風煙落洞庭溪客去迷花藹藹野人居愛竹泠泠
何時遂買登山屐乘興還來扣石扃

過故妻墓

湘臯煙草綠紛紛灑淚東風憶細君每恨嫦娥工八月
虛疑神女解為雲花陰午坐閒金剪竹裏春愁冷翠裵
留得舊時殘錦在傷心不忍讀回文

汴梁

汴上荒城繞故宮山頭危石墮秋風夷門市起聞嘶馬

梁苑樵歸見斷鴻
鬪草尚餘殘後碧
進花無復盛時紅
欲登高處腸先斷
滿目閒愁賦未工

送姚子微

雙闕除書下玉階
三湘回櫂拂冰崖
天垂銅柱南低海
地入金陵北近淮
江國雁來秋肅肅
驛樓雞動曉啾啾
大家定有東征賦
鮭菜隨船慰老懷

送盧茂實之廣東憲幕

仙城近接衆山迴
憲府遙臨百粵開
海上喜通持節使

幕中兼得濟時才
蛟宮織罷魚龍出
蜃戶珠還蚌蛤來
預想到官多暇日
清詩題徧嶺頭梅

徐州

斷山數里見浮屠
水樹微茫映日疎
舟楫徧經危石過
人煙稍近白雲居
朱陳縣遠思遺俗
楚漢臺荒想故墟
萬古風帆自來往
新詩吟罷獨躊躇

送湘中李從事赴郴幕

長沙上游山水窟
郴陽自古說名邦
天圍翠岳連三楚

地合清湘赴九江歸去收書經石室坐來拄版對雲窗
西風慘淡都門別莫愛青樓倒玉缸

雪中次元茂才

北闕今晨雪滿遲腐儒憂國畏人知月寒弱水迷三島
雲暗蒼梧失九疑端木細飄天上葉梅花潛發嶺南枝
山陰那得乘佳興起遶前軒自詠詩

出郭

晴光縹緲汎青春遠色氤氳動紫塵出郭自因芳意早

尋溪兼得野情新
花邊古寺翔金爵
樹底高墳臥石麟
却倚層丘望城闕
上方雲氣繞龍鱗

寄河間趙運使

雪盡官河春水生
移家還出鳳凰城
竹間退食古靈鵲
花外題詩聽早鶯
並井青煙晨縹緲
漕溝素月夜分明
京華久客遙相憶
欲托音書不稱情

候友人不至戲作

儀真城下菖蒲節
晴日江頭錦繡文
旗影送船侵樹過

笛聲催鼓隔花聞
雙龍鏡化閒風雨
五馬歌沈暗水雲
日暮故人期未至
誰家看舞石榴裙

送趙仲禮御史兼呈王侍御

都門相送意躊躇
別路秋生白羽車
霜雪總看鵬去疾
風煙那問雁來疎
嶺南斥候愁烽燧
江左誅求畏簡書
白面少年空解事
繡衣行縣定何如

建業城頭烏亂啼
知君感古夜聞雞
荆揚貢賦元趨冀
晉宋文章漸入齊
草疏或依松影坐
哦詩應就竹陰題

書來肯憶京華客日日長衢聽馬嘶

賜書南粵初歸日駐楫秦淮欲暮天嘯詠偶經梁舊寺
登臨猶憶晉諸賢謝安別墅蟲鳴裏王導新亭鳥去前
多謝府中賢侍御別時能作送行篇

答何好禮

鳳凰城中花若煙客遊多是感流年春生江漢思南國
雪盡幽并見北邊遠使豈貪歸有橐微官仍苦坐無羶
相逢未恨今晨別滿把驪珠慰目前

同孔學敏遊仙遊觀

鳳音亭下草如熏
誰見仙娥倚翠裙
環珮忽疑遊處得
笙簫猶想去時聞
湘江竹暗連春雨
衡岳花開隔暮雲
千古遊人自來往
登高回首思紛紛

寄方君恕

聞君卧疾近如何
閉戶時應賦短歌
安石或能携妓出
子猷常擬棹船過
微風倚檻宜脩竹
落日臨池愛綠荷
也念湖邊未歸客
秋山回首白雲多

奉和存初院使

上林嘉木蔭連牆
冉冉遊絲轉日光
忽憶江南好晴景
碧溪春水照鴛鴦

題方叔高歸羸集後

鳳凰城中木落時
空齋獨夜把君詩
最憐庾信腸堪斷
常思陰鏗髮蚤垂

寄題進士宋翔仲書室

淳安縣東金紫峰
宋公舊隱隔雲松
山人採蕨應常到

溪客尋花或未逢

聞道蔗南脩竹裏小堂清誦夜常勤
煙中谷響遙相答月下泉流靜始聞

和陳宗道元夕懷江南絕句

萬家行樂愛春晴花底遙聞度曲聲
惟有客窗嫌月色照人離恨太分明

潞縣舟中寄京師楊上舍諸公

二月和風滿上林憶君時復走相尋
夜來見月堪腸斷

城鎖千門碧樹陰

題畫

迢遞雲山隔遠溪微茫煙水帶長堤秋來木葉多搖落
日暮寒鴉不肯栖

遊園和吳光輔

雪外高亭倚竹根石門幽徑躡苔痕重來花發應千樹
只恐漁舟失洞門

題張天彞山水卷

江上晴雲起島山行人長慕釣舟閒雙鴻更背湘潭去
朝盡衡陽幾日還

簡善道原

湖南五月洞庭秋楊柳深深繫客舟遙憶郡齋無一事
題詩頻到岳陽樓

題家山小景

浴鳬飛鷺聚寒塘落雁歸鴉映夕陽忽憶湖南煙樹裏
倚欄秋思正茫茫

雁起秋空樹色遙
行人江上駐歸橈
海門東去應千里
白日微茫見落潮

石倉歷代詩選卷二百五十一

欽定四庫全書

石倉歷代詩選卷二百五十二

明 曹學佺 編

元詩二十二

揭傒斯

得程翰林揚州消息

皇明屬休期側席佇貞良
遊麟既集藪鳴鳳亦在岡
君子乘時興出餞何輝光
車馬塞江介笳鼓迎羽觴
時秋

風雨交四顧野茫茫晨鉦激中流飛旆忽異方蓄思遵
旋軌浮雲紛北翔道路間邦畿艸木隕寒霜晷影修易
流悲來但徊徨君懷經綸憂予負疚疾妨寒沈固異趣
情誼結中腸居下衆所夷在賤誰不忘宛緬廣陵翰胡
獨置我傍鬱悵增愁思投袂睇莽蒼自顧匪茅茹委質
任空牆淵淵賢達心悵悵情內傷

春暮間居寄城西程漢翁十五韻

迢迢層城阿戕戕鳳凰山下有隱淪士能爲河漢言兩

日一寓音五日一承顏每談經濟事恒及離亂間言辭
多慷慨文字少凋殘不歎東逝川但憶南山田寧與無
心遊不受衆目憐褰衣必峻嶠散步亦名園卷舒信在
襟蕭寂固所安經春窘疾痲撫時增懦孱羣書亂藥裹
高卧掩荆關蹇予屬久要朝詣常暮還醜劣愧高情焉
知君所觀日出衆鳥語蒼岑滿樓端申章寫深詣謏薄
何由宣

初至京師和答友人病中見示

志士輕離別貧賤事多違秋風車馬中故人高卧時遠
客江南至塵土滿素衣既申離合情中多勞苦辭歡笑
未幾何感歎已乘之欲及田里事復愁疾痰滋疊疊流
景遷榆柳各變衰偃息寄一室朝夕終在茲委運復何
言人生信可疑我獨何為者日出暮來歸

送華尊師以天壽節奉詔賜武當

靈時嚴漢祠神峰標楚甸羽人丹丘伯承詔馳嘉薦華
渚曜玉虹條風舞玄燕長淮雨中瀉喬嶽雲間獻涉甸

歷峻址梯空答弘願授簡香始升揭虔帝如眷天清翼
軫動地肅玄武見飛響迥相聞竒祥靜逾絢是中有真
侶早接諸方援胼胝負畚鍤鑿翠蓄雷電金芝產齋房
璫雲冠巖殿祈禱無歲年會節方紛衍既協時君降又
樂明祀徧聖歷齊堪輿豐澤周寓縣還歸報天子獨往
奚所羨

送客省冷副使歸豫章覲省

始違山林賞復作遠遊客忽興慈母念辭帝去京國楊

柳河上春飄然就行役聞者爲驚喜朋儔皆歎息昔依
禁樹枝今戀山巔柏世俗更推蕩日月如有迫歸雁羣
響哀遙雲孤飛白都門一樽酒落景淡行色以我留滯
心送君南征翮

三月三日奉陪憲使程公遊麻原第三谷宴藏
書山房白雪樓

明公富暇豫勝日懷登臨蹀躞驄馬行窈窕幽人心懸
崖響晴雨奔流濯春陰雲門轉絕壑畫橋貫長林拂石

慨往運聞鐘知古音者松有百圍突嶂踰萬尋小憩釣
魚臺聿瞻華子岑捫蘿入縹緲側徑臨蕭森上有百尺
樓下有孤猿吟初筵俯層巔微風蕩危襟笑語信忘我
觥籌浩難任豈不念永留惘然歸思深

送李掾自北回歸省長沙因簡趙宣慰張徵士

呂宗二判官

萬里風沙斷三湘日夜流名成親白首歲暮客扁舟黃
鵠延歸思丹楓替別愁眼穿迴處雁心靜狎餘鷗細雨

黃陵廟殘陽杜若洲漸深桑梓敬翻畏友朋留送遠慚
羈旅臨分憶舊遊鐘聲衡岳曙帆影洞庭秋風壤通蠻
徼煙霞拂帝丘交歌明月市傾旆壓雲樓訪菊逢徵士
行瓜識故侯爲言憔悴客敝盡黑貂裘

送姜尚忠得官後携新妾歸息

淹薄徂年歲離別忽在茲寒城落木後虛館殘鐘時家
在雙井上心隨孤雁飛落日布帆遠青山尊酒移蒼茫
倚閭情愴怳零雨詩托身名教中固應慎其儀志尚豈

不殊情鍾自成悲昔見已云晚再會良無期濯足彭蠡
流長歌高堂歸鶴髮喜垂涕兒童問牽衣野老借檄看
隣女隔牆窺田園各成熟松竹仍參差親故一在眼雞
黍相提携翻知在室樂不恨爲官遲放浪成化遷何用
世俗知

遊麻姑山雲關

君子荷初服思至若無榮穆穆芳雨散悠悠蒼山行危
關擁霧黑飛桁緣雲青苔蘚滑如積松杉香冥冥時逢

負芝翁忽聞流水聲舉足向益高矯然欲遐征徒隸各
忘倦矧彼高人情

麻姑壇

嵯峨仙都觀遙望丹霞天後有千歲松前有百頃田風
日夏颯沓煙雲晝蔥芊羣彥一時集安知非列仙持觴
起相酌罷琴接高言天道信悠邈人情何拘攣靈君不
可致落景詎少延仰雖慚冥冥俯實憂元元主人顧坐
客此中可忘年

送雷山人遊山

高人雨中至邀我遊山作自非冥寂徒孰遣紛華落方
春廼發軔殘雪猶映薄隨雲度神臯披煙望靈嶽晞沐
朝陽谷照影清冰壑淹留皆隱淪往返必恬漠惟應樵
與牧逢時得奇藥歸來雖未期髣髴終如昨

廖氏皆春堂

時清日月明心和寒暑平東風扇萬物花間語流鶯農
興水泉動蠶起桑柘榮牛羊被原隰鹿豕徧郊坰少者

擊壤歌老者鼓腹行不知天壤間何物異吾生常願天
子聖四海無苛征夔龍滿廊廟簫韶歌九成

寄題馮掾東臯園亭

時雨散繁綠渚風滿平原興言慕君子退食在丘園出
應當世用入詠幽人言池流澹無聲畦蔬鬱葱芊高林
麗陽景羣山若浮煙好鳥應候鳴新音和且閒時與文
士俱逍遙農圃春理達自知簡情忘可避喧庶云保貞
和歲暮委周旋

賦得吳歌送人歸吳中

三月酒如澠高堂絲竹停繡筵雙鳳影珠箔亂鶯聲疊
應紅牙拍辭傳金縷名綵雲低不度芳塵暗自驚花發
長洲苑日照闔闔城且奉千金壽寧忘萬里情

黃鶴山聽雨得清字

玄扃息深構虛館舍餘清瀟灑松上來瑟縮花間鳴遙
兼夜杵警細與寒更并懷親感離別撫物愧生成土思
浩方殷春聲耿逾明幸及朋知好達此旦暮情北展非

窮轅南山夢歸耕何言託毫素聊與歎平生

湖南憲使盧學士移病歸潁舟次武昌辱問不

肖姓名奉寄

大德七年

我本耕牧豎結廬章江涘微生屬休明世尚猶典禮驚
飈卷飛轍寥落從此始三年江漢春萬事隨逝水既昧
理生術復慚遊方旨豈無青山歸亦有桑與梓何爲苦
留滯眷眷存君子君子諒不然東臯畢耘耔

正月十二日尋盧學士船至漢口留詩爲別

晴江澹微瀾，電雲在層巘。參差連舫出，散漫羣鷗遠。始知遵漢廣，遙睇高旆卷。懷賢每忘賤，臨流亦忘蹇。蒼茫景將入，杳渺春猶淺。新知遽相違，餘悰何由展。

重餞李九時毅賦得南樓月

娟娟臨古戍，晃晃辭煙樹。寒通雲夢深，白映蒼祠暮。胡牀看逾近，楚酒愁難駐。雁背欲成霜，林梢初泣露。故人明夜泊，相望定何處。且照東湖歸，行送歸舟去。

秋興亭得南字

兩郡對郭郭一水分西南高亭不屢尋孰知遊者貪江
勢泓初轉山光遠相涵芳洲賈人舫野渡遊子驂落日
覆寒郊輕風散迴潭安得近故里時來拂晴嵐

過江州

遙瞻九江樹已踏西江土落日照庾樓驚風滿湓浦寒
鷗迎棹起遠岫依城吐悵然感羈遊澹爾成賓主白頭
釣魚叟赤足浣紗女未識居者歡安知行者苦

春日雜言

羃歷楊柳枝蒙茸春草齊天天誰家婦采桑臨路岐零
露沾其裳蛛絲卷其衣樹高身苦弱蠶饑行復遲辛苦
事姑嫜宿昔減容輝見者皆歎息此心知獨誰良人日
暮至嗔問汝何爲

遊禪林寺喜得昌上人

靈臯獨懷往危軒泊閒寂偶與塵事違況值禪林客深
苔上脩玉輕霏澹凝碧覓見飛鳥還靜聞寒溜滴空明
會真賞漂流得良覲常恐心迹乖無由展平昔

淵明歸興圖

家貧無酒飲，聊欲試絃歌。
去家百餘里，邈若異山河。
江上日多風，浩浩水增波。
門前五柳樹，繁蔭空婆娑。
秫田已收成，歸計當如何。

雜詩

青青孤生松，高出浮雲中。
下有嘉樹林，上有萬里風。
俯視原上草，秀色何丰茸。
自顧豈不高，獨立難爲容。
常恐本根蠹，委此蒿與蓬。

送袁先輩之盱江

賤貧戀知己親愛畏離別
雨罷江色黃扁舟此時發
煙綿綠蕪遠杳渺孤禽沒
行雲滿西原麻姑在天末

黃尊師高軒觀鵞因留宿

開軒南嶽下世事未曾聞
落葉常疑雨方池半是雲
偶尋騎鶴侶來此看鷺羣
一夜潺湲裏秋光得細分

飲張氏別墅

楚國多才俊張家好弟兄
出門湖水碧留客野堂清
微

雨鳴疎竹塞煙覆古城園人隔畦語歲暮此中行

以事暫如武昌發臨川

江轉欲無路山迴忽似圍客程秋共遠物色晚多違稍
稍沙鷗集匆匆野樹稀武昌今夜夢定遇故人非

過南康夜泊聞廬阜鐘聲

廬山三百寺何處叩層雲宿鳥月中起歸人湖上聞入
空應更迥近瀑正難分遙想諸僧定香爐上夕熏

春日雜言

我有琅玕草欲贈江東客出門道路長卷袂空歎息靈
苗世所尚良士予所惜神仙無千年耿耿誰復識

喜趙順昌官滿來歸

七載卑栖邑孤標浩蕩中去時惟自信歸日幾人同平
世難爲澤高人不計功黃河萬里道洗楫待春風

寄題永豐劉氏暖翠亭

孤亭萬竹中危坐自生風近與山光合遙連野氣通鳥
啼深不見泉響靜偏聰東帛休相汚先生道未窮

其二

鷄山俯鷺溪亭子畫堂西流水芙蓉合陽林竹樹齊耕
桑煙外集賓客雨中携萬事俱塵土詩成手自題

山水

野艇來無數山橋度有三寒雲依古寺落木帶羸驂回
首重重變幽尋處處堪平生雙眼力江北復江南

送陳教授赴郴州

君向郴州去迢迢千里餘年侵別後鬢客問講殘書斷

雁秋風外啼猿落日初興文今日意慎莫愛吾廬

出三洪峽

積水羣山裏行舟亂石間地偏疑隔世峽怒欲藏關獨
鳥啼深樹斜陽下急灘千憂逢一快未覺此生孱

山莊晚立有懷舍侄沆督穫臨川

藪藪黃桑葉蒼蒼白竹峰居人爭野碓歸客背村鐘路
暗緣溪濕山寒著露濃阿成收稻米辛苦缺相從

望嶽

岱宗齊魯間萬古統羣山日向夜中見雲從海外還蓄
靈深屏翰空翠滿河關盡日臨清霽巖巖不可攀

寄題太子文學張希孟凝雲石

聞說張文學家藏石一拳斷痕分淺黛古色亂輕煙潤
想猶懷玉幽疑欲迸泉應從少梅得宿昔滿桑田

石鼓

孔廟頽墻下周宣石鼓眠苔分敲火迹雨洗篆螭涎野
老偷爲白居人打賣錢有形終亦盡流落謾堪憐

銅儀

宋沈存中所鑄

法像坤儀重來從汴水遷飛龍纏四極黃道界中天望
絕秋毫永循環太古前荒臺明月夜應有淚潺湲

山水卷

稍稍雲木動藹藹煙峰亂遠浦引歸橈雙崖臨絕岬方
思隱淪客欲結漁樵伴水濶山更遙幽期空汗漫

尋舍弟將至東牟宿野店

歲暮尋吾弟山行兩舍餘入雲攀磴道落日返村墟茅

店溪邊冷松林石上踈如逢武陵客風景未應殊

自盱之臨川曉發

扁舟催早發隔浦遙相語雨色暗連山江波亂飛霧初
辭梁安峽稍見石門樹杳杳一聲鐘如朝復如暮

趙道士山水圖

悄愴寒山曉淒迷野水昏長橋通古寺小艇背衡門路
盡雙松上雲生亂石根如行南嶽暮遙見祝融尊

送周山人之遼東

物變風已暄庭虛雪猶在每與君子違偏驚歲年改名
山先夢到靈藥隨方采明日望行人雲槎隔遼海

大駕既還獨候驛傳未得和陳真人見示

供奉關山遠淹留日月長鄉書迷楚越鄰笛亂伊涼秋
水流成字晴雲去作行寸心懸帳殿應似雁隨陽

沈逸人東觀招飲山館

野館青山下晴軒積雨餘招尋蒙遠客寂寞愧閒居空
翠沾杯冷殘雲度谷虛從茲結朋好隨處問何如

參禪圖

圖寫洞賓黃
龍東坡佛印

兩山從兩禪異代各談玄絕壁浮春樹空山響夜泉共
遺行住想俱斷去來緣此日開圖畫焚香亦爽然

和傳與礪

近日何多念頻年不肯還河流無故道春色是他山
几看雲凭衡門罷月關無情寒與暑偏解鑄衰顏

桂林歌贈胡秀才

遠望兮桂林鬱蒼蒼兮窈深去無路兮來不期美君子

兮勞我心皎皎兮明月桂偃蹇兮不可掇曠蕩兮商風
發吾思兮天末

新安許氏蘭秀軒

蘭生兮深谷漱流泉兮蔭高木綠葉兮披披玉幹兮紫
蕤植之于堂下播芳馨兮菲菲菲菲兮陽陽思君子兮
高堂絙琴瑟兮會友嘉穀苾兮薦芳襲芳兮佩秀宜君
子兮多壽

登祝融峰贈星上人

洞庭南桂嶺北衡山連延瀟湘黑中有祝融如髻鬟嵯
峨七十二峰間祝融不自知千山萬山如迴環迴環面
面芙蓉裏儼如天仙朝紫皇千官百辟遙相望半夜每
瞻東海日六月常飛滿樹霜龍拏鳳攫熊虎躑雲生霧
滅何時極我來正值太平時況有山僧似疇昔憑高一
覽四海空草間培塿安足雄盤盤羅漢臺翕翕炎帝宮
復恐九天上視我如井中朔風日夜相騰蹙谷老崖堅
松柏禿古來鐵瓦盡飄揚山上至今猶板屋山僧勸我

歌我歌徒自傷天下五嶽嵩中央此山與我俱南疆我
今三十始一見北望中原天更長

送黃五舅得武陵較官還辰州寓居省侍

寧上山頭種禾黍莫向他鄉作羈旅山田得雨尚有年
他鄉憔悴何人憐一身千里家何在全家更在沅湘外
獨樹雞鳴楓葉飛荒村雁落蘆花碎親在窮途望子還
子在長途衣復單居無寸田出無僕明年作官當食祿
望葛市有懷故人盧子儀以附他舟不得上岍

相見予往赴主一書院時盧寔送予至長沙
今經其里不一造門能無憾乎至樊口作

順流無風江更急歲暮歸人浩難繫所思只隔江上村
亂樹參差不容入憶昨扁舟泝雲夢觸熱千里能相送
我來悵望竟空還一樽知是何年共樊山蒼蒼赤壁暮
武昌對岬黃州路連聲大笑櫓如飛回頭獨送孤雲去

楊柳青謠

楊柳青青河水流黃河流兩岬葦籬長河東女嫁河西郎

河西燒燭河東光
日日相迎葦檐下
朝朝相送葦籬傍
河邊病叟長回首
送兒北去還南走
昨日臨清賣葦回
今日販魚桃花口
連年水旱更無蠶
丁力夫徭百不堪
惟有河邊守墳墓
數株高樹曉相參

題邢先輩西壁山水圖

邢家蒼蒼西屋壁
萬壑千巖動寒色
大江忽轉天地迴
浮雲孤飛日月白
參差樓觀照林紅
松檜淒迷起朔風
崑崙蓬萊不可到
赤城白帝遙相通
賤子平生尚奇偉

南極衡湘北幽冀復從大駕卜灤京始投邢君多意氣
君昔扈從戎馬間少壯不知行路難月明飲馬長城窟
雪深射虎祁連山萬里歸來太平日坐我江山憂百失
平明萬騎出天門又駕官車就行役

研山詩 山石出靈壁其大不盈尺高半之中
隔絕澗前後五十五峰東南有飛磴橫出方
平可二寸許鑿以爲硯號曰研山在唐已有
名後歸于李後主主亡歸于宋米芾元章刻

其下述所由來甚詳宋之季歸于天台戴運
使覺民後又歸其族人宰相賈似道求之弗
與携持兵亂間寢處與俱乃獲全大都太乙
崇福宮張真人本戴氏子今年春貽書得之
請予賦詩其辭曰

何年靈壁一拳石五十五峰不盈尺峰峰相向如削鐵
祝融紫蓋前後列東南一泓猶可愛白晝玄雲生靈靄
在唐已著羣玉賦入宋更受元章拜天台瀕洞雲海連

戴氏藏之餘百年護持不浼權貴手離亂獨與身俱全
帝傍真人乘紫霞尺書招之若還家陰崖洞壑寒飭飭
宛轉細路通褒斜崑崙蓬萊與方壺坐卧相對神仙居
硬黃從寫黃庭帖汗青或抄鴻寶書秦淮咽咽金陵道
此物幸不隨秋草願君谷神長不老淨几明窗永相保
題百丈輝長老所藏李仲賓之孫歲寒圖

豫章西南百丈峰下有太竹多長松巢雲貯霧翻飛淙
緣崖繞澗迷春冬馬駒踏人有龍象東陽老輝在百丈

西江瀉入半甌茶卧竹眠松九天上薊丘丈人子又孫
筆入造化春無痕清風瀟瀟上界聞夜闌疎鐘啼斷猿

白楊河看月

白楊河上看明月昔人曾照今人別茅屋數家河上村
化作三山白銀闕波平風靜棹歌來萬頃冲融鏡面開
今夜江南憶遊子空瞻雲漢上昭回茫茫萬里燕齊路
北斗縱橫泰階曙黃河東逝月西流明日南風過洪去

送玄上人

清江古鎮卦谿道靈峰寺中玉泉好靈峰上人天上歸
親見六龍天上飛湧金門外潮來去曾是錢塘江上住
十里松風六月寒夢寐猶思徑山路自叅天目老禪師
始信靈峰路不迷却被無端徵詔起等閒來往不曾知
黃河萬里從西下呂梁百步如犇馬歸去山中問玉泉
應向海門深處瀉

送秦從事巖卿赴遷安令

聲名籍籍秦著作不見郎君出宰時路入北平黃葉盡

夢回西掖白雲移罷氓舊塞猶耕種野老深村幾亂離
遙想此行前未有來時嗟晚去思遲

楚山秋晚

山人何處抱琴歸遙想樓臺隔翠微老樹風生舟正泊
空江日落雁初飛豈無賦客能招隱亦有漁翁醉息機
一幅秋光舒復卷誰教塵土浣人衣

過族侄

東面雲山有草堂下臨池水即滄浪草侵古道莓苔滑

花壓顏垣薜荔香每訪所親皆異物始驚爲客久殊鄉
仲容兄弟賢相映更爲吾宗足感傷

大信晚泊呈舟中諸公

千家楊柳江當門東梁西梁兩岬蹲連檣大艦集日昏
撻金伐鼓海上聞小江更出采石後前人立功後人守
大信花采石酒陌上相逢莫回首

子陵獨釣圖

何事玄纁入里閭羊裘整脫就安車空令太史驚同寢

猶把狂奴視報書一出聊爲天子重諸公莫道故人疎
朝廷自足中興士且放桐江著老漁

婺源州判官赴調京師授饒州路樂平州同知
致仕拜命而卒歸葬廬山

南從江漢北幽燕生死相知二十年空有明恩容致政
更無餘景待歸田六丁愁闕還鄉路五老催迎上水船
遙想生平宦遊處祇將遺愛向人傳

遠浦歸帆

冥冥何處來小樓江上開長恨風帆色日日誤郎回

平沙落雁

天寒關塞遠水落洲渚濶已逐夕陽低還向黃蘆沒

寄題傅氏吾一齋

衆流俱到海萬籟各還虛寂寞空山裏高齋獨掩書

曉坐張先生朝陽軒

朝日照高樹幽人方啓關蕭寥塵外事風葉滿窗間

曉出順城門有懷何太虛

步日城南門悵望江南路前日風雨中故人從此去

和歐陽南陽月夜思

月出照中園鄰家猶未眠不嫌風露冷看到樹陰圓
天清照逾近夜久月將遠牆東雙白楊秋聲隔窗滿

別武昌

欲歸常恨遲將行反愁遽殘年念骨肉久客多親故佇
立望江波乘春正東注

煙寺晚鐘

朝送山僧去暮喚山僧歸相喚復相送山露濕人衣

洞庭秋月

顯氣自澄穆碧波還蕩漾應有凌風人吹笛君山上

去婦詞

輕合鮮義終苟容非禮遇遠結萬里婚多爲才名悞始
與君結好不知君有婦有女嫁他人俱懷託遲暮青青
牆下草生死牆下路娟娟道傍花零落無處所女子失
其身何以保貞素既乖百年意百年誰能度對鏡空悲

惜中心良難訴浮萍難爲託一木無兩附棄舊屬新歡
新歡漸成故寧當中路折莫被他人去寧老阿母傍不
受他人妬騰身出房間兩絕無復顧豈願嫁他人甘心
西山樹

送祜上人歸當陽

學道玉泉寺從師天子都流年春事半歸路客帆孤山
勢遙連蜀江聲不入吳故園如可到種芋有遺區

李宮人琵琶引

范范青瑑春風裏歲歲春風吹不起傳得琵琶馬上聲
古今只有王與李李氏昔在至元中少小辭家來入宮
一見世皇稱藝絕珠歌翠舞如乘空君王豈爲紅顏惜
自是衆人彈不得玉觴爲舉樂乍停一曲便覺千金值
廣寒殿裏月流輝太液池頭花發時舊曲未終新譜續
繁聲萬變總相宜三十六年如一日長得君王賜顏色
形容漸改病相尋獨抱琵琶空歎息興聖宮中愛更深
承恩始得遂歸心時時尚被宮中召強理琵琶絃上音

琵琶調轉聲逾澀
堂上慈親還佇立
回看舊賜滿牀頭
落花飛絮春風急

居庸行

昔望居庸南
今出居庸北
巖巒爭吞吐
風水清且激
逶迤數千里
曲折殊未息
關門兩向當
天開馬如流
水車如雷荒
雞一鳴關吏起
列宿慘淡雲徘徊
山盤盤石圍圉
狀如龍勢如虎
龍怒欲騰虎欲舞
太行劒戟猶如許
昔不容單車
今馬列十伍
聖人有道
關門開關門開千

萬古

長風沙夜泊

長風沙風沙不斷行人嗟行人嗟奈君何南風正高北
風起大船初灣小船喜移船更近大船頭不獨風沙夜
可憂但祝行人好心事長江何處是安流茅舍參差數
株柳時平尚置官軍守青裙老嫗詫鮮魚白髮殘兵賣
私酒

夏五月武昌舟中觸目

兩髯背立鳴雙櫓短蓑開合滄江雨青山如龍入雲去
白髮何人並沙語船頭放歌船尾和蓬上雨鳴蓬下坐
推蓬不省是何鄉但見雙雙白鷗過

題明皇出遊圖應制

明皇八駿爭馳道還是開元是天寶長安花發萬年枝
不識年華醉中老奎章閣下文書靜袞衣高拱唐虞聖
莫言此畫徒爾爲千載君王作金鏡

高郵城

高郵城城何長城上種麥城下桑昔日鐵不如今爲耕
種場但願千萬年盡四海外爲封疆桑陰陰麥茫茫終
古不用城與隍

夢黃鶴樓

黃鶴樓前鸚鵡洲夢中渾似昔時遊蒼山斜入三湘路
落日平鋪七澤流鼓角沈雄遙動地帆檣高下亂成丘
故人雖在多分散獨向南池看白鷗

送詹尊師歸廬山

香爐峰色紫生煙一入京華路杳然雲碓秋閒春藥水
雨犁春卧種芝田書憑海鶴來時寄劒自潭蛟去後懸
忽報歸期驚倦客獨憐微祿負中年

送大名安治中守沔陽

展驥猶穿魏郡花分符忽指竟陵瓜行瞻禹迹過三澨
帶擁義文望五華春雨蠶桑無曠土秋風魚稻滿貧家
亦知王政仁爲本莫厭公田飯有沙

憶昨二首

宮草蔥茸禁樹稀日趨廷顯對凝輝朝迎步輦花間出
暮送回鑾柳下歸碧殿東浮蒼嶽合金河北引玉泉肥
幾回弘慶門前路春氣濛濛欲染衣

己巳羣儒映璧奎端陽侍燕寶慈西線分學士親臣送
詩賜黃姑御手題注酒舍春瑤露重承塵轉午錦雲低
日斜共出西門道既醉猶能散馬蹄

附范梈

濡露亭

初秋白露降爽氣逼虛幃薄林方泥泥灑漢復霏霏暗
襲玉堂潤斜飄金掌微鶴眠寒屢警螢度濕猶飛葉垂
知月朗花艷怯暘稀蘭飲畏朝墜草沾傷夕歸爲霜當
宿戒去日浸增歎娉婷吳宮女三月采薔薇挹披枝上
香散入舞裳衣千歲亦不滅但恐願初違君子保世澤
在久愈光輝

贈別張清夫還吳

新雨不作泥鉤輈樹上啼征夫懷遠路家在太湖西別

家今幾度楊柳江邊樹念卿車輪下漸是中年路萬事
中年尚可期人生旦暮長別離長別離向何方九河落
花清浦香玉睢斑斑鳬乳黃南望不見三高堂柰此遊
子思故鄉我家朱公濟時早功成身退天之道當時未
必知者賢羣挽不回卧煙島後來閱盡虧成事始識從
初去時好我不能赤手縛虹霓又豈委身同草木生逢
堯舜世肯受泥塗辱昨者誤奮龍門雷螻蛄嘲之自云
足憂來舉觴酌白日惟有皇天照空谷張公子吳江生

我有千載意不羨身後名爲君寫作送行曲曲中鏗憂
難爲情君行不聽意不平明日買船棹秋聲亦欲東下
窺滄瀛飄然始去白玉京須君禹穴相逢迎相迎不見
須相待客行雖遲心不改

杏葉黃

杏葉黃天雨霜穹窿攜日照八荒迴光照見白玉堂堂
中美人雙珮璫中宵抱被坐西廂忠君愛親兩不忘奈
何零露沾衣裳清曉樓頭見征雁不如謝官歸故鄉

輓轡怨

門前水揚聲似雨幽人當窗碧絃語東里征夫去不歸
一雙蛾睂鏡中舞年年井上攀轡轡勞心只恐秋葵枯
他年種得長生草梅花落盡青青好

十月九日詣天光門上進三朝

儀鸞簇仗滿雲端玉鑰初聞衆樂攢三后龍光周典冊
羣臣鵠立漢衣冠爐香著日浮晴靄宮樹班香試曉寒
千騎前頭都不避祇傳學士拜金鑾

送白无咎太守之郡

瀟灑中書舊省郎排雲曾攬舜衣裳一麾況復守名郡
萬事不如歸故鄉馬首漸違燕闕雨雁聲遙度晉城霜
漢廷擇相皆良吏蚤奉潘輿謁建章

開歲

自違北極向南辰重見東皇似故人合席管絃方殿歲
殊鄉花柳覺先春水歸楚澤魚俱化天覆周郊獸亦仁
薄宦于時無補報且須康濟百年身

草堂

草堂不在萬山峰時有幽人步往蹤
雨壓牆煙籠薜荔石行渠水鑑芙蓉
清名豈讓陶貞白共住猶強陸士龍
忽憶雁行天外去歸來期在粵城中

和李溉之園居雜詠

書劒上青霄鄉關雨雪遙韶華侵水竹
客思墮三苗會憶商巖綺將從鄭里僑
文辭誠小伎祗比俗情饒

其二

豈是幽棲地飛騰亦未量城根分鼠壤池面合魚梁名
久喧郎署歌時感女桑畏卿音調苦疇復貴相忘

其三

野色依簾障天光切戶庭草生連夜雨花落徧池星未
遂翔寥廓真堪託晦冥逢時須紫燕得意拂青萍

鍾陵夜宿聞鐘

中年江海夢靈皇夜半聞鐘似上陽一百八聲猶未已
更兼雲外雁啼霜

憶得

憶得佳人白苧詞
幾將天外數歸期
自從落盡庭前樹
夜夜秋聲總不如


池館夜坐聽雨

更聲隨雨動
譙門頗似聽泉宿
楚原客裏青燈如骨肉
獨能相待至黃昏

臨觴

幾見春鐘度上陽
偶因寒盡強臨觴
故鄉只在車輪下

自是青雲道路長



石倉歷代詩選卷二百五十二